

全華叢書



金華叢書



白雲集四卷

金華叢書

退補三昇離

序我

國家文教休明隆重師儒特行配享之典

命兩浙督撫大臣廣宣德化纂修誌書博采先賢遺
文以彰盛事婺州素稱小鄒魯名儒接踵余來守是
邦延訪理學如仁山先生居敬立志繼王文憲之傳
分別理欲接北山文定之學蓋二先生之得統於朱
子者金氏有以演其脉而孔孟之學賴以不墮厥功
懋哉又再傳而得白雲許先生本師說爲著述與何

王相表裏爲能推明洙泗之心傳故人稱爲紫陽世嫡夫著書立說以發明聖道者前賢之功也網羅遺文以傳之不朽者後人之責也在文定公已有文集十卷以及學庸啟蒙通論近思錄諸篇皆有發揮至若文憲公所著之書則有讀易記涵古易說大象衍義涵古圖書文章指南等書凡數百卷特其文多放佚未能彙成全集心甚惜之雍正己酉文安公之後裔孔時出其家藏手錄之書得大學疏義論孟攷證及文集五卷鋟板行世而猶以未睹許文懿公之書

爲歎因竭力搜羅幸獲文集四卷質諸何王金氏之言文異而道同皆所以接紫陽之踵演洙泗之派如百谷之朝宗於海所謂滴滴歸源者也因以兩先生之書彙成一集以副

聖天子崇儒重道之至意以見配享兩廡之有由且可以識正學之有宗而朱陸異同之辨亦瞭若指掌異日倘得並集何王二先生之書與此合爲全集於以紹前賢而啟後學余更有望於有心斯道者是爲序時雍正十年五月上浣中憲大夫知金華府事襄

平馬日炳撰

原序

婺學自北山四傳至白雲先生中間魯齋仁山兩世
皆單傳至白雲而天下渾一燕趙齊魯淮揚之士皆
百舍重繭而至登弟子集者幾于千人道風廣布十
倍于前矣嘗試論之北山如良玉溫潤魯齋如明霞
麗天仁山如金刀切玉白雲如和風被物故其行廣
惜無嫡嗣而葉景翰范景先皆有道者柳道傳黃文
獻宋文憲皆私淑門人也白雲著書甚多今惟有零
篇剩語散見于諸書而鮮見其全好古者則重價購

之不可得予得此本于弟子蔡六平急思得其人鐫而布之計惟有金太學孔時能時仁山集初告竣而金華徵獻略方鳩工未卽與言適樵李戴碧川先生爲麗正書院師予門人黃殿選攜示此往戴先生喜而序之見孔時愆愆之遂決曰此仁山弟子書猶吾仁山書也先儒凡著一書皆其一生之學問與其一時之精神所到精神之在天地不可磨滅如燈將燼必有人焉吹其焰而續之此皆彼此交感于作者之精神而默應於數百年以前與數百年以後者此數

卷書白雲著之吾也藏之孔時刻之戴先生從旁鼓
舞之彼此相湊若或使之予以深山老學以書爲命
無足爲難難在孔時然則孔時信今之超出流俗而
默與先賢相感通于性命間者也時雍正十年四月
既望東陽後學王崇炳虎文謹叙

原序

水行地中千條萬派莫不從崑崙發源而來猶夫學者窮經立說傳道解惑有不自洙泗來乎由洙泗而濂洛由濂洛而關閩一脉相承道統綿綿弗絕何其盛哉嗣後有造邪說以亂之招岐途以引之而終不能蠱惑人心必以紫陽爲傳道之準斯時知有南軒張宣公東萊呂成公相與扶植而輔翼之以爲功之至鉅者矣而不知無何王砥柱于乾道咸淳之間必不能傳于金許無金許振興于紹定大德之時又何

能綿遠于今茲也哉嘗讀仁山文集知其傳道于白雲始而曰吾儒之學理一而分殊旣而曰聖人之道中而已矣總不外聖門博約之教而先生遂領斯旨身體力行卒成大儒攷其從游年月不滿三載而仁山先生歿矣非信道之篤能如是之速哉又嘗讀元史至儒林傳載許先生行實云制行最嚴所應世者不膠于古不流于俗介而不矯通而不隨時想其生平行誼殆顏閔之流與其書不可不傳傳其書則傳其道也婺州金子孔時仁山先生之後裔篤好理學

刻成先集欲購白雲先生著述同刻一編以表師弟
相承之誼而難得其書東陽王虎文先生博學君子
也藏書最富有先生舊刻文集四卷什襲寶之聞欲
重刊欣然發出借錄副本愆恩剗剗流傳海內以勸
來學成人之美莫善于此故不揣鄙陋樂而序其顛
末知世間寶光必不終掩也雍正十年夏四月朔樵
李後學戴錡書

墓誌銘

先生諱謙字益之姓許氏其先占籍京兆之興平後有官於吳者因家焉九世祖延壽宋刑部尙書六世祖實元豐間始居笠澤尋又徙婺爲金華縣人曾祖諱經國祖諱應龍皆弗仕考諱觥淳祐丁未進士卒官宣教郎主管三省樞密院架閣文字無子以從父兄貢士君日宣之次子嗣卽先生也先生天資高嶷甫能言貢士君之夫人陶氏授以孝經論語入耳輒不忘五歲就學莊重如成人宋亡家毀貢士君相繼

淪沒先生稍長僑居城闔借書於人以四部分而讀之雖疾恙不廢所涉向博知解且至旣開門授徒而猶有所疑無所從質聞仁山金先生講道蘭江上委己而學焉金先生曰士之爲學若五味之在和醯鹽旣加則酸醎頓異子來見我已三日而猶夫人也豈吾之學無以感發於子耶先生聞之惕然是時金先生年七十先生三十有一矣請不拘常序就弟子列而所居相距尙遠會金先生設教於呂成公祠下乃獲便於參扣金先生嘗告之曰吾儒之學理一而分

殊理不患其不一所難者分殊耳先生由是致其辯
於分之殊而要其歸於理之一又嘗告之曰聖人之
道中而已矣先生由是事事求夫中者而用之金先
生歿先生益肆克闡多所省得自謂吾非有大過人
惟爲學之功無間斷耳先生制行甚嚴而所以應世
者不膠於古不流於俗介而不矯通而不隨身在草
萊而心存當世大德十一年歲在丁未熒惑入南斗
向北而行先生以爲災在吳楚竊深憂之是歲大禳
先生貌加瘠或問曰先生豈食不足耶先生曰今公